

Lojem wan taks riten

Wan Kaed Blong Ol PALM Skim Woka Long Ostrelia



Blong evri faenansol yia long Ostrelia, mos long ol wokman long Ostrelia oli nid blong lojem wan tax riten ('tax return') blong faenem ol tax peimen we oli mas mekem o karembak mane sapos i gat wan rifan.

I no nid blong yu lojem wan tax riten sapos yu wan wokman we yu kam ovasis mo yu stap sot taem ('short-term foreign resident') anda long PALM skim, mo evri mane we yu winim hem i kam long wok blong yu long PALM skim.

Faenansol yia blong Ostrelia hem i blong twelef manis stat long 1 Julae go kasem 30 Juin.

Maet yu no risivim wan ofisel rikwes blong komplitim wan taks riten be i no minim se i no nid blong mekem.

Pepa ia hem i eksplenem from wanem mo haonao blong yu komplitim wan taks riten mo tu hem i blong sapotem yu blong yu mitim ol rikwaemen blong tax.

Wanem nao hem i wan tax riten?

Tax riten: Wan tax riten hem i wan fom yu fulumap mo lojem (sabmitim) wetem Australian Taxation Office (ATO) blong wokemaot stret amaon blong tax we yu nid blong pem, o sapos oli mas rifandem yu.

Mi nid blong lojem wan tax riten?

Sapos oli emploiem yu anda long PALM skim blong sot taem, i minim se maet yu wan 'foreign resident for tax purposes' (man we i liv ovasis blong pepos blong tax). Yu no nid blong lojem wan tax riten sapos evri mane yu winim hem i kam tru long wok blong yu long PALM skim wetem apruv emploia blong yu.

Sapos yu wok anda long PALM skim blong longtaem, maet yu wan 'Australian resident for tax purposes' (man we i liv long Ostrelia blong pepos blong tax). Bae yu nid blong lojem wan tax riten.

Blong moa infomesen, go long [websaet blong ATO long saed blong PALM skim](#).

Hao nao i wok?

Sapos yu wok, bae yu pem inkam tax long salari blong yu o mane we yu winim. Oli kolektem inkam tax truaot long yia taem yu winim mane.

Emploia blong yu bae hemi stap karemaot mane long evri peimen blong yu mo sendem i go long Ofis blong Tax blong Ostrelia (ATO) long bihaf blong yu. Hemia oli stap singaotem, Pay As You Go (PAYG) withholding. Bae oli mekem olsem blong mekem sua se yu no gat wan bigfala amaon blong tax blong pem long en blong yia. Bae yu save luk amaon blong tax we emploia blong yu hemi stap karemaot long pei slip blong yu.

Taem faenansol yia hem i en, ATO bae i kaontem ol PAYG withholding we emploia blong yu i karemaot long pei blong yu

truaot long yia. Bae hem i soem sapos oli mas rifandem tax long yu o yu nid blong pem moa.

Bae mi save risivim wan rifan long ATO?

Oli no promisem se bae yu risivim wan tax rifan long ATO. Hem i difren long evriwan. Samfala man bae i kasem wan tax rifan be samfala bae i mas pem mane i go long ATO. Yu no mas ekspektem blong risivim wan rifan long tax.

Wea nao blong lojem wan tax riten?

Kasem help long wan tax ejen we hem i rejista

Sapos yu wantem wan tax ejen blong priperem mo lojem tax riten blong yu, o blong provaedem advaes long yu, yu sud mekem sua se oli rejista wetem Tax Practitioners Board (TPB). Yu save jekem registresen blong olgeta long TPB Register long tpb.gov.au blong mekem sua.

Ol tax ejen o profesonel bae oli jajem wan fi blong komplitim mo lojem tax riten blong yu we hem i araan \$100 i go kasem \$200. Mekem sua se yu askem fi blong hem mo yu glad long hem bifo oli gohed long tax riten proses ia.


Lojem i go daerek long ATO – hemi fri

Yu save mekem hemia tru long [ATO Online](#), we yu save linkim i kam long [MyGov akaon blong yu](#). Hem i fri nomo be yu mas mekem yu wan.

Yu save lojem wan tax riten tru long pepa fom tu.

Wanem wei yu jusum blong lojem tax riten, bae yu tingbaot nomo se yu mas tekem risponsibiliti long wanem yu talem insaed long hem. Mekem sua se ol didaksen we yu listim oli tru mo yu inkludum evri inkam we yu karem bifo yu o ejen blong yu i lojem riten ia.





Lojem wan taks riten

Wan Kaed Blong Ol PALM Skim Woka Long Ostrelia

Hao long nao i tekem blong prosesem tax riten blong mi?

Nomoli i tekem **14 dei** blong oli prosesem wan onlaen tax riten. Sapos wan staf blong ATO hem i nid blong prosesem tax riten blong yu, bae yu wet kasem 30 dei.

Sapos yu lojem tax riten blong yu tru long pepa, i save tekem kasem 50 bisnis dei blong oli prosesem.

Yu save jekem progres blong tax riten yusum ol step daon ia:

- Go long ATO Online tru long MyGov
- Kol long fon sevis (13 28 65 mo jusum opsen 1 mo 1 bakegen).

Wanem nao bae mi nidim blong lojem wan tax riten?

Online income statements: Yu save faenem wan inkam stetmen onlaen we hem i soem ful amaon we yu bin winim long wok mo hamas tax oli bin pem truaot long faenansol yia. Emploia blong yu bae i save givim hemia long yu, o yu save faenem long ATO Online tru long MyGov.

Wanem taem blong lojem wan tax riten?

Lojem tax riten blong yu afta yu risivim inkam stetmen blong yu we i talem '**tax ready**'. Mos long ol wokman oli gat kasem **14 Julae** blong mekem hemia. Sapos yu lojem tax riten bifo hem i 'tax ready' maet ol infomesen long inkam stetmen i no komplit mo i save kosem dilei long tax riten proses.

Sapos yu nid blong komplitim wan tax riten yu mas lojem o faenem wan tax ejen bifo **31 Oktoba**. Sapos yu lojem tax riten i let tumas, bae oli save faenem yu.

Notem: jekem se ol kontak diteil mo bank akaon diteil oli stret taem yu lojem tax riten blong yu. Hem i helpem ATO blong kontaktem yu mo mekem sua se tax rifan i kasem yu.

Medicare levy

Sapos yu wan Australian resident mo yu winim mane bitim \$24,276 long faenansol yia mo yu no kasem Medicare anda long Family Accompaniment Pilot Program, yu mas komplitim wan [Medicare Entitlement Statement](#). I no nid blong yu pem Medicare Levy sapos yu karem wan Medicare Entitlement Statement mo waef/hasban blong yu mo ol pikinini (sapos i gat) olgeta tu i gat wan Medicare Entitlement Statement. Yu save aplae long wan Medicare Entitlement Statement tru long MyGov o fulumap wan onlaen fom. Yu mas lojem wan niufala aplikesen evri yia.

Yu sud wet kasem taem yu risivim Medicare Entitlement Statement bifo yu lojem tax riten blong yu.

Ol step blong folem blong lojem wan tax riten

STEP 1

Karem inkam stetmen blong yu. Nomoli hem i aveilobol long ATO Online tru long MyGov afta long 14 Julae.

STEP 2

Sapos **yu nomo yu stap lojem tax riten onlaen**, plis go long ATO Online tru long MyGov mo folem ol instraksen.

Sapos yu **lojem tru long wan narafala pesen** (tax ejen we i rejista).

- Faenem wan tax ejen we i rejista long lokol eria blong yu - yu save faenem tru long fri [TPB public register](#).
- Emploia blong yu maet i save rikomendem wan tax ejen.
- Bukum wan apoenmen o go long ofis blong olgeta. Bae yu nid blong provaedem ol inkam stetmen mo/o ol risit.
- Mekem sua se yu andastanem se maet yu pem fi semtaem tu. Samfala oli gat opsen blong askem tax profesonel ia blong karemaot fi blong olgeta long tax rifan blong yu.

STEP 3

Bae ATO o tax ajen i letem yu save sapos yu nidim blong pem mane, o sapos bae yu risivim wan tax rifan. Notem: sapos yu gat kaon bae yu mas kontaktem ATO blong mekem ol peimen blong yu. Rifan blong yu i save tekem kasem **5 bisnis dei** bifo i kasem bank akaon blong yu we yu bin listim.

Yu gat sam narafala kwestin?

Sapos yu nidim moa infomesen:

- toktok wetem ol narafala woka o tim lida blong yu
- toktok long emploia blong yu
- toktok long wan narafala long komuniti blong yu olsem long jioj blong yu o spot klab blong yu
- kolem PALM support service line: 1800 51 51 31
- kolem ATO's individual helpline: 13 28 65
- visitim websaet blong ATO: [Lodging your first tax return | Australian Taxation Office \(ato.gov.au\)](#)
- Infomesen long saed blong TPB hem i aveilobol [long ples ia](#) we hem i talemaot sam samting yu mas mekem.

